

# LATIH MAHASISWA BEBAS BERSUARA

**Pengwujudan** Parlimen Kesatuan Pelajar oleh Bahagian Hal Ehwal Pelajar, Universiti Putra Malaysia (UPM), Serdang, Selangor dilihat sebagai landasan terbaik bagi melatih mahasiswa sebagai pemimpin masa depan.

Naib Canselor Universiti Putra Malaysia (UPM), Prof Datin Paduka Dr Aini Ideris berkata, inisiatif itu menjadi saksi zahirnya komitmen tinggi pihak universiti menyediakan wadah kepada pelajar untuk bebas bersuara, berpolitik dan berpersatuan dalam usaha memperjuangkan hal ehwal pelajar, kebajikan serta akademik mereka.

Beliau berkata, inisiatif itu juga bagi menyediakan latihan kepemimpinan yang lebih baik dengan struktur tersusun, memabitkan pemimpin pelajar dengan melaksanakan pengasingan kuasa yang lebih jelas serta melancarkan aliran kerja.



**PELAJAR** yang bersidang di Parlimen UPM.

“Pelaksanaan Parlimen Kesatuan Pelajar ini turut menyediakan latihan kepemimpinan politik kepada pelajar, selain melahirkan pemimpin dalam kalangan mereka yang terdedah kepada suasana perdebatan yang meraikan perbezaan dan membudayakan pemikiran

kritis golongan itu.

“Selain itu, parlimen ini dapat mencipta ruang semak dan imbang, selaras dengan cita-cita mempertingkatkan kualiti serta daya saing graduan,” katanya ketika ditemui pada Majlis Pembukaan Sidang Parlimen Kesatuan Pelajar UPM, baru-baru ini.

Turut hadir, Timbalan Naib Canselor (Hal Ehwal Pelajar dan Alumni) merangkap Timbalan Yang Dipertua Dewan, Prof Dr Mohd Roslan Sulaiman.

Persidangan pertama memabitkan 79 perwakilan terdiri daripada 45 ahli Majlis Perwakilan Pelajar (MPP)

itu akan bertindak sebagai kumpulan Eksekutif dan 18 ahli Jemaah Presiden Majlis Perwakilan Kolej Kediaman serta 16 ahli Jemaah Presiden Persatuan Mahasiswa Fakulti sebagai kumpulan legislatif.

Dr Aini berkata, usaha itu menyerlahkan UPM dalam

menerajui pendidikan politik, kebajikan pelajar dan kebebasan bersuara dalam kalangan pelajar.

“Besarnya harapan saya supaya 79 perwakilan yang terdiri daripada 45 ahli eksekutif dan 34 ahli legislatif ini menghasilkan keputusan yang menjadi titik tolak gerakan pelajar seiring melengkapkan dan membantu usaha universiti.

“Saya juga berharap semua ahli sidang dapat menggalas tanggungjawab dengan penuh integriti. Berbahaslah dengan tertib, sopan dan susila sesuai sebagai sebuah institusi parlimen yang didirikan di atas negara yang menjunjung keilmuan dan keserjanaan.

“Gunakan sepenuhnya peluang yang diberikan untuk meningkatkan kesejahteraan dan berkerjalah sekuat mungkin menerajui usaha menjaga kepentingan dan kebajikan pelajar,” katanya.